

Evening Dogri (NSD)

Bulletin 27-06-2024

आकाशवाणी

खबरां विजय बजाज कोला।

- राष्ट्रपति द्रौपदी मुर्मू होंरें संसद च लोकसभा ते राज्यसभा दी सांझी बैठ गी अज्ज संबोधित कीता।
- लेफ्टिनेंट गवर्नर मनोज सिन्हा होंरें अज्ज पहलगाम च इक उच्ची सतह दी बैठक लाइयै श्री अमरनाथ जी दी जातरा लेई तैयारिएं दा जायजा लैता।
- नीट अंडर ग्रेजुएट पर्चा लीक मामले च सी.बी.आई नै दऊं लोकें गी गिरफ्तार कीता ऐ।
- भारती जनता पार्टी नै सैम पित्रोदा होंरें गी विदेश कांग्रेस दा अध्यक्ष नियुक्त करने पर अज्ज कांग्रेस पर त्रिक्खा जवाबी हमला कीता।
- दक्खन पच्छमी मानसून नै देसै दे केई हिस्सें च दस्तर देई दिती ऐ जेदे चलदे लोकें गी जबरदस्त गर्मी कोला राहत थ्होई ऐ।

<><><><><><>

President-Address

राष्ट्रपति द्रौपदी मुर्मू होंरें अज्ज आखेआ ऐ जे जम्मू-कश्मीर नै भारत दे दुश्मनें गी बनकदा जवाब दिता ऐ कीजे हाल च होए दे लोकसभा दे चुनाएं च केंद्र शासित प्रदेश च रिकार्ड गिनती च मतदान होआ ऐ। उनें आखेआ जे जम्मू-कश्मीर च मतदान गी लेइयै कई दहाकें दे रिकार्ड टुट्टी गे'न। पार्लियामेंट दी दोनें सभाएं दी सांझी बैठक दौरान अपने अभिभाषण च राष्ट्रपति होंरें आखेआ जे पिछले चऊं दहाकें च कश्मीर च बंद ते हड़तालें करियै घट्ट मतदान होआ करदा हा ते मुल्खै दे दुश्मन अंतरराष्ट्रीय मंचें पर इस कश्मीर दी राय दे तौर पर

प्रचारित करदे हे। उवां इस बारी कश्मीर घाटी नै इस चाल्ली दी ताकतें गी बनकदा जवाब दित्ता ऐ। उनें आखेआ जे लोकें गी इस बारै पता ऐ जे छड़ा इयै सरकार उंदी आसें-मेदें गी पूरा करी सकदी ऐ। राष्ट्रपति होरें आखेआ जे नमीं सरकार पार्लियामेंट दे औंदे इजलास च पैहला आम बजट पेश करन जा करदी ऐ जेड़ा औंदी दूर तोड़ी असर पाने आहली नीतियें ते भविक्ख दे नजरिये दा इक्क असरकारी दस्तावेज होग। राष्ट्रपति होरें अपने अभिभाषण च आखेआ जे दस्सें बरें च देश 11मीं थाहर कोला पंजमीं सब्बनें कोला बड्डी अर्थ बवस्था बनी गेआ ऐ। उनें आखेआ जे दुनिया दे बक्ख-बकख हिस्सें च लड़ाई ते आपदा दे बावजूद भारत नै एहू कमाल करी दित्ता ऐ। उनें एब्बी आखेआ जे उंदी सरकार भारत गी दुनिया दी त्री सब्बनें शा बड्डी अर्थ बवस्था बनाने लेई कम्म करा करदी ऐ। उनें प्रधानमंत्री ग्रामीण सड़क योजना तैहत 3.8 लक्ख किलोमीटर बनाई गेदी शिड़कें दा बी जिक्र कीता। राष्ट्रपति होरें अशांत इलाके च तेजी कन्नै विकास होने मगरा इनें इलाके वां मरहलेवार अफसपा गी हटाए जाने दी बी गल्ल कीती। पेपर लीक होने बारै गल्ल करदे होई राष्ट्रपति होरें आखेआ जे सरकार नै इस मामले दी जांच कराने ते कसूरवारें गी सजा देने दा धेइया कीते दा ऐ। राष्ट्रपति होरें नमें चुनोए दे सांसदें गी ममारखां दित्तिं, उनें आखेआ जे देश च चुनाएं दौरान कई रिकार्ड बनाए गेन ते समूलची दुनिया एहूदे बारै गल्ल करा करदी ऐ।

<><><><><><>

Prez. Address

विपक्ष नै अज्ज संसद दे सांझे इजलास गी कीते गेदे राष्ट्रपति द्रौपदी मुर्मू हुंदे संबोधन दी नुक्ताचीनी कीती। संसद दे बाहरें मीडिया कन्नै गल्लबात च कांग्रेस दे सांसद तारिक अनवर होरें आखेआ जे इस संबोधन च गरीबी, महंगाई ते बेरोजगारी सने असल मुद्दें दी अनदिक्खी करिए छड़ा सरकार दी उपलब्धिएं गी उजागर कीता गेआ। कांग्रेस दे इक होर नेता प्रमोद तिवारी होरें आखेआ जे एहूदे च किश नमां नेई हा। संबोधन च नीट दी अनियमितताएं दा कोई जिक्र नेई हा। समाजवादी पार्टी प्रमुख होरें आखेआ जे सरकार 5मीं सब्बनें थवां बड्डी

अर्थ बवस्था होने दी गल्ल करदी ऐ पर बेरोजगारी ऐ, करसान तकलीफ च न ते लाहू किश चुने दे लों गी थ्होआ करदा ऐ।

<><><><><><>

Parliament-Proceeding

राश्ट्रपति द्रौपदी मुर्मू हुंदे अभिभाषण दी इक कॉपी अज्ज लोकसभा ते राज्यसभा च पेश कीती गई। राश्ट्रपति होरें पार्लियामेंट दी दौनें सभाएं दी सांझा बैठक गी संबोधित कीता। स्पीकर ओम बिरला होरें एब्बी घोषणा कीती जे कांग्रेस सांसद राहुल गांधी होरें गी लोकसभा च विरोधी धड़ें दे लीडर दे तौर पर मानता दिती गई ऐ। मगरा सभा गी दिनें लेई मुअत्तल करी दिता गेआ।

<><><><><><>

New Oath MP

बिहार, झारखंड ते मध्य प्रदेश दे 6 नमें चुनोए दे सांसदें अज्ज राज्यसभा सदस्य दे तौर पर सगंध लैती। इनें नमें सांसदें गी राज्यसभ दे सभापति जगदीप धनखड़ होरें सगंध दोआई। कांग्रेस सांसद अखिलेश प्रसाद सिंह, जे.एम.एम दे डॉ. सरफराज अहमद ते बीजेपी दे प्रदीप कुमार वर्मा, बंसीलाल गुर्जर, माया नारोलिया ते बालयोगी उमेशनाथ होरें सदन दे सदस्य दे तौर पर सगंध लैती।

<><><><><><>

PM-JDU MPs

जनता दरबार यूनाइटेड दे बिहार दे सांसदें अज्ज संद भवन च प्रधानमंत्री नरेंद्र मोदी हुंदे कन्नै मलाटी कीती। सोशल मीडिया दी इक पोस्ट च श्री मोदी होरें आखेआ जे बीजेपी ते जनता दल यूनाइटेड दा किट्टे रलियै कम्म करने दा इक लम्मा इतिहास रेय दा ऐ। उनें आखेआ जे मुखमंत्री नितिश कुमार हुंदे नेतृत्व च बिहार, तरक्की-बाद्दे दी बत्ता पर अगडा बधेया ऐ। प्रधानमंत्री होरें आखेआ जे दौनें पार्टियां सुशासन लेई लगातार किट्टे कम्म करदिआं रौहडन।

<><><><><><>

LG-Yatra Meet

लेफ्टिनेंट गवर्नर मनोज सिन्हा होरें अज्ज पैहलगाम च इक उच्चि सतह दी बैठक लाइयै श्री अमरनाथ यात्रा लेई तैयारिएं दा जायजा लैता। एल.जी होरें पुलस ते सुरक्षाबलें, डॉक्टरें ते नर्सिंग अमले, ड्यूटी अफसरें, राहत ते बचाहू टीमें ते साफ-सफाई सरबंधी अमले दी तैनाती बारै चर्चा कीती। उनें आखेआ जे श्रद्धालु जम्मू-कश्मीर दे ब्रैंड एम्बेसडर ना। उनें इब्बी आखेआ जे सब्बनें सरबंधत धडें, पुलस, सुरक्षाबलें ते बक्ख-बक्ख सेवां उपलब्ध करोआने आलें बश्कार तालमेल अत्त लाजमी ऐ तां जे जात्तरा गी कामयाब बनाय जाई सकै। एल.जी होरें पैहलगाम दे नुनवन आधार शिविर च श्रद्धालुएं लेई उपलब्ध सुविधाएं दा बी जायजा लैत्ता।

<><><><><><>

SANJY-2024

सालाना श्री अमरनाथ जी दी जात्तरा दा पैहला जत्था जम्मू थवां कश्मीर लेई कल रवाना होग। इस ब'रे दी श्री अमरनाथ जी दी जात्तरा 29 जून थवां शुरू होआ रदी ऐ। जम्मू दे भगवती नगर आले आधार शिविर पर श्रद्धालुएं दा औना शुरू होई गेआ ऐ। इत्थुआं इनें श्रद्धालुएं गी सख्त सुरक्षा बंदोबस्तें हेठ बालटाल ते अनंतनाग आले आधार शिविर लेई रवाना कीता जाग। यात्रा बडुलै 4 बजे भगवती नगर आले यात्री निवास थवां रवाना होग।

सैकड़ों बड़े केंद्री सशस्त्र पुलस बल यात्रा झूटी पर तैनात कीते गए न। 85 किलोमीटर लम्में श्रीनगर-बालटाल आधार शिविर ते पहलगाम काजीगुंड आधार शिविर आली शिडक दी निगरानी लेई सी.ए.पी.एफ दियां टीमां लाइयां गेदियां न। प्रशासन आस्सेआ मनीगाम ते मीर बजार थाहर यात्रा लेई आरजी शिविर बनाए गेदे नं अजें तगर 3 लक्ख 50 जहार श्रद्धालुएं अमरनाथ जी दी जात्तरा लेई पंजीकरण कराया ऐ।

<><><><><><>

Amarnath-Yatra

श्री अमरनाथ जी जात्तरा दी तयारिएं गी खीरी रूप देने लेई श्रीनगर दे डिप्टी कमिशनर डॉ. बिलाल मोहिउद्दीन भट्ट होरें पैथ चौक स्थित श्रीनगर आले आरजी शिविर दा दौरा लाया। इस मौके पर उंदे कन्नै होर दुए अफसर बी मौजूद हे। डिप्टी कमिशनर होरें रौहने-बौहने, बिजली, पानी, साफ-सफाई ते लंगर सने होरनें सुविधाएं दा जायजा लैता। इस मौके पर बोलदे होई डिप्टी कमिशनर होरें आखेआ जे शिविर दी समर्थ गी बदाया गेआ ऐ ते श्रद्धालुएं दे रश दे चलदे 5 जहार श्रद्धालुएं गी इत्थे ठहराने दी बवस्था ऐ। श्रद्धालुएं लेई जात्तरा गी सुविधाजनक बनाने आस्तै सारे इंतजाम पैहले सोयां करी लैते गेदे न। उनें आखेआ जे जिला प्रशासन श्रीनगर ते सिविल समाज श्रद्धालुएं दे सौआगत लेई पूरी चाल्ली तैयार ऐ।

<><><><><><>

CBI NEET Arrest

सीबीआई नै नीट यू.जी म्तेहान च कथित बे-जाबतिएं दे सरबंधै च 2 लोकें गी गिरफ्तार कीता ऐ। सूत्रें मुजब इनें दौनें आरोपिएं गी बिहार दे पटना थवां हिरासत च लैता गेआ। नीट-यू.जी पेपर लीक मामले दी जांच सीबीआई करा'रदी ऐ। सीबीआई सोमवार बिहापर पुलस दी आर्थिक अपराध इकाई दे दफ्तार पुज्जी ते मामले दी जांच शुरू कीती।

<><><><><><>

Niti Ayog Health

नीति आयोग दे मेंबर डॉटर. वी.के पाल होरें अज्ज भारत च इक सेहत गतिविधियें लेई पर्यावरण सरबंधी कनूनी मूल्यांकन बारै दऊं रोजा राश्ट्रीय परामर्श प्रोग्राम दा उद्घाटन कीता। नमीं दिल्ली च लग्गे दे इस प्रोग्राम दौरान सेहत ते परिवार दी भलाई-बेहतरी सरबंधी मंत्रालय दे सचिव अपूर्व चंद्रा होर बी मौजूद हे। इस परामर्श प्रोग्राम दा मकसद सेहत दे क्षेत्र च असर पाने आहले पर्यावरण कारणें ते कनूनी कारणें दा पता लाना ऐ।

<><><><><><>

Advani-Discharged

भारती जनता पार्टी दे वरिष्ठ नेता लाल कृष्ण आडवाणी होरें गी अज्ज नमीं दिल्ली दे अखिल भारती आयुर्विज्ञान संस्थान एम्स थवां छुट्टी देई दित्ती गई। उम्मी सरबंधी कारणें करी उनेंगी कल रातीं अस्पताल च भर्ती करोआया गेआ हा। 96 बरें दे नेता होरें गी डॉक्टरें दी निगरानी च रक्खेआ गेदा हा।

<><><><><><>

BJP-Pitroda

भारतीय जनता पार्टी नै सैम पित्रोदा होरें गी विदेश कांग्रेस दा अध्यक्ष नियुक्त करने लेई अज्ज कांग्रेस पर जबानी हमला कीता। पार्टी प्रवक्ता शहजाद पूनावाला होरें नमीं दिल्ली च मीडिया कन्नै गल्लबात दौरान आरोप लाया जे पित्रोदा हुंदी परतियै नियुक्ति उंदे आस्सेआ हुनै तगर आक्खी गेदी गल्लें दे समर्थन गी दर्शादी ऐ। पित्रोदा होरें अपनी किश टिप्पणिएं दे कारण पिछले म्हीने इस औहदे शा इस्तीफा देई दित्ता हा।

<><><><><><>

Monsoon

दक्खन, पच्छमी मानसून नै गुजरात च उत्ती अरब सागर दे बाकी दे हिस्सें, राजस्थान ते पच्छमी उत्तर प्रदेश दे किश होर हिस्सें, मध्य प्रदेश, उत्तराखंड, हिमाचल प्रदेश, बिहार, जम्मू-कश्मीर, लद्दाख, गिलगित, बाल्टीस्तान, मुजफ्फाबाद दे मते सारे हिस्सें, पंजाब दे किश हिस्सें ते पूर्वी उत्तर प्रदेश दे किश हिस्सें च अज्ज दस्तक देई दित्ता ऐ। अगले 2 शा 3 दिनें दरान राजस्थान, मध्य प्रदेश, छत्तीसगढ़, हरियाणा, पंजाब, उत्तराखंड, हिमाचल प्रदेश ते जम्मू च बी दक्खन पच्छमी मानसून होर बधने लेई हालात मते साजगार ना।

<><><><><><>

Delhi-Rain & Weather

राजधानी दिल्ली ते एहदे आले दोआले दे इलाके च मानसून कोला पैहले आले बरखा दे फंडाके नै लोकें गी गुम्मे आली गर्मी कोला दना'क राहत पुजाई ऐ। जंदी रातीं बरी दी बरखा कन्नै तापमान च बी गिरावट दर्ज कीती गेई ऐ ते मौसम एल्लै शैल-सुहावना बने दा ऐ। दिल्ली दे सरिता बिहार, मुनिरका, लक्ष्मीनगर, यमुना बिहार सने नोएडा ते गाजियाबाद ते इंदे कन्नै लगदे इलाके च भारी बरखा बरी ऐ जेदे कारण लेई इलाके च सड़के पर पानी किट्टा होई गेआ ऐ ते लोकें गी आओजाई च काफी दिक्कत दा सामना करना पवा करदा ऐ। मैहकमा मौसम मुजब असम, मेघालय, अंडमान निकोबार द्वीप समूह, पच्छिम बंगाल दे किश इलाके, सिककम ते बिहार दे केई इलाके च भारी बरखा दी पेशनगोई कीती दी ऐ। मैहकमे दा आखना ऐ जे कल कोला लेइए 30 जून तगर झारखंड, ओडिशा, उत्तराखंड, पूर्वी राजस्थान, पूर्वी ते पच्छमी उत्तर प्रदेश, हिमाचल प्रदेश, हरियाणा ते पंजाब च रूकी-रूकिए तेज बरखा होई सकदी ऐ।

अमरीका काँग्रेस दे हेठले सदन नै पाकिस्तान च होए दे आम चुनावं दी सुतंत्र जांच कराने दा प्रस्ताव पास कीता ऐ। पाकिस्तान च लोकतंत्र ते मनुक्खी अधिकारें दे लेई समर्थन देने आले इस प्रस्ताव च 2024 आम चुनावं च कुसै चाल्ली दी गड़बड़ी दी दावेदारी च सुतंत्र ते निर्पक्ख चुनावं दे महत्व पर जोर दित्ता गेआ ऐ। तोआई अमरीका च पास इस प्रस्ताव पर अपनी प्रतिक्रिया दिंदे होई पाकिस्तान दे रक्षा मंत्री होरें एहदे पर सख्त ऐतराज जतांदे होई एहदी सख्त नुख्ताचीनी कीती ऐ। एह प्रस्ताव 85 प्रतिशत सदन दे सदस्यें दी शमूलियत कन्नै पास कीता गेआ ऐ जिंदे चा 98 प्रतिशत सदस्यें एह सर्मिन च बोर पाया। पाकिस्तान च इस बरे 8 फरवरी गी आम चुनावं कराया गेआ हा।

<><><><><><>

SMVD-Yatra

श्री माता वैष्णो देवी जी दी जात्तरा भारत च प्रसिद्ध तीर्थ स्थानें च शामिल ऐ। इस बरे अजें तगर श्री माता वैष्णो देवी जी दे दर्शनें गितै 50 लक्ख थवां बद्द श्रद्धालु आए न। पिछले बरे इससै अवधि दौरान 48 लक्ख थवां बद्द श्रद्धालु आए एहे। एह गिनतरी अपने आपा च इक बड्डी उपलब्धि ऐ। इस गिनतरी कन्नै इस तीर्थ स्थान प्रति लोकें गी श्रद्धा ते आस्था दा पता लगदा ऐ। त्रिकुटा प्हाड़िणं च स्थित इस पवित्र श्राइन च लक्खां बद्दे लोकें दी श्रद्धा ते आस्था जुडी दी ऐ।

<><><><><><>